

臺灣史蹟源流館興建碑記

臺灣自古為海上仙山，載籍所謂蓬萊瀛洲方壺者，非吾台莫屬。惟千年一瞬，華夏漢族之來臺，見於文史者，千百餘年而已，誠不足以言古。當代考古人類學繁興，發掘史前文物及遺蹟甚勤，公認以臺東長濱文化為最早，應可上溯至五萬年前。時為更新世第四冰期，臺灣與大陸仍有地相連，往來無阻；其後陸續而來之族群，可考者約二十，歷經同化，現仍有九至十族，即今日所稱原住民。大多源於華南一帶，最晚者亦近萬年。今日臺灣與華南出土之人類與動植物化石及器物，分期定性，皆能相合。至今華南少數民族仍達七八十種之多。臺灣古先民之由來有自，源遠流長，已堪論定，毋庸置疑。後因海水隔絕，孤懸域外者萬千年，迄隋唐以降，浮海而來者尚少，明清兩代以至民國，漢人數度大量東徙，始有今日之規模。故歷代史蹟文物，皆以近數百年所遺存者為多。其間外人盤

據，亦有年所，吾臺之史蹟，乃益見其紛繁駁雜矣。

余於主持臺灣省政期間，恒念史蹟難尋，文物可貴，保存不易，如任由散佚，滋為可惜。先哲云：民吾同胞，物吾與也。是無分族類，不論先後，皆吾同胞也。生聚繁衍，代代相傳，皆後人所不能忘。爰有臺灣史蹟源流館等文化館之倡建。今此館落成，余雖已卸省任，而關懷依舊，樂觀厥成。尤望執事諸君，對原住民族之史蹟多所珍重，置為前列，以明吾臺史事源流之久遠。謹誌緣起，幸邦人君子共鑒之。

行政院院長 連

戰



謹撰

中華民國八十四年歲次乙亥十月二十五日